



21. februar 2017

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit Tasiilami mittarfissaq pillugu:

1. Tasiilami timmisartunut suluusalinnut mittarfiliornissamut atatillugu misissueqqaarnerit sumut killippat tassunga atatillugu tusarusuppara silasiorfinnik ikkussuineq aamma sumut killissimansoq?

2. Naalakkersuisut qaqugu misissueqqaarnerit naammassiumaartut naatsorsuutigaa?

3. Suna pissutaava Tasiilami mittarfiliornissap Kalaallit Airport A/S-p ataani Naalakkersuisut suliakkiissutaannut ilaannginneranut?

4. Naalakkersuisut 2018-mut Aningaasanut Inatsisissamut atatillugu makku immikkut aningaasaliiffigisinnaavaat:

- Unnuakkut ikumasartussanik qullernik ikkussuinissamut kiisalu Tasiilami Heliportip immikkut sulisoqartalernissaanut, isumannaarumallugu ilaasut aamma takornariat Kulusummiik Tasiilamut sukkanerusumik tikittalersinnaanissaat.

5. Tasiilami Heliportimi unnuakkut ikumasartussanik qullilersuinissaq Naalakkersuisut qanormita akeqassagatippaat aamma tamatuma kingorna ukiumut ingerlatsinermut aningaasartuutit qanoq annertutigilissanersut Naalakkersuisut nalilerneqarpaat?
(Inatsisartunut ilaasortaq Justus Hansen, Demokraatit)

Tunngavilersuut:

Piviusuuvoq Tunut angalasartut amerlanersaat Tasiilamukartuusarmata. Angallanneq pillugu Isumalioqatigiisitat 2011-mi innersuussutiminni nalilerpaat, mittarfiup Kulusummiit Tasiilamut nuunneratigut apuuttarfiit taakku marluk akornanni timmisartuussinerit ukiumut 1.640-nik ikilertiinneqarsinnaasut.

Angallanneq pillugu Isumalioqatigiisitat nalunaarutigaa, tamatuma assigigaa akunnerni 273-mi timmisartuussisarneq, taamaattorli helikopterimik ingerlatsinermi piffissap atorpeqartartoq marloriaataasoq, tassani piffissartorfigineqartarmata piareersaaneq aamma matusineq. Tamatuma nammineq takutippaa ingerlatsinikkut annertuumik sipaartoqartalissasoq. Angallanneq pillugu Isumalioqatigiisitat nalilerpaat ukiumut 6,8 millioner koruuninik aningaasartuutit ikileriassasut - qissiminneqanngitsoortorli iluaqutissaq aamma tassaavoq avatangiisit iluaquserneqartarnissaat,



tingisarnerit ikinnerusut kingunerissammasuk CO2-mik mingutsitsinerup annikinnerulernissaa.

Tamatuma saniatigut Tasiilami mittarfeqalernerup kingunerissavaa takornariat amerleriarnissaat, tamannalu pisariaqarpoq Tasiilami inuussutissarsiorneq annertuumik ilungersunartorsiorfiummat. Mittarfeqalernikkut qularnaatsumik suliffissaaleqisut ikilisinneqassapput taamaasillunilu innuttaasunut inuussutissarsiortunullu aamma siunissaq isumalluarnarnerulissaaq.

Eqqumiigiuaannarnikuuara 2011-mili Tasiilami timmisartunut suluusalinnut mittarfissaq pillugu suliaq taama annikitsigisumik nikeriarsimammat aamma tamanna tunngavigalugu apeqqtikka apeqqtigaakka, kissaatigigakku annertuumik suliap sukkanerungaartumik ingerlanneqalernissaa. Siusinnerusukkut oqaatigeriikkattut; Tasiilami innuttaasut naammattorsuarmik utaqgereerput!

Apeqqutima ullut suliffiit naliginnaasut qulit iluanni akineqarnissaat kissaatigaara.